



Brisel, 9.6.2026. godine

MEDIJIMA

SAOPĆENJE ZA MEDIJE

Održan 9. sastanak Pododbora za unutrašnje tržište i konkurenciju

Na devetom sastanku Pododbora za unutrašnje tržište i konkurenciju, uključujući zaštitu zdravlja i potrošača, između Evropske unije i Bosne i Hercegovine, koji je održan 9. juna 2026. godine u Briselu, razmijenjene su informacije o radu Konkurencijskog vijeća BiH i Vijeća za državnu pomoć BiH. Delegacija BiH je informisala o usvojenim podzakonskim aktima vezanim za državnu pomoć. Komisija je naglasila da vlasti u BiH trebaju izmijeniti Zakon o konkurenciji i Zakon o državnoj pomoći kako bi se, u skladu s pravnom stečevinom EU, revidirale procedure odlučivanja te ukinulo pravo veta na etničkoj osnovi. Potrebno je, također, osigurati nezavisnost u radu Konkurencijskog vijeća BiH i Vijeća za državnu pomoć BiH te jednaku i transparentnu primjenu pravila o državnoj pomoći u cijeloj zemlji.

Evropska komisija je ocijenila kako je BiH u oblasti javnih nabavki dostigla određeni nivo pripremljenosti, te pozdravila aktivnosti na provođenju Strategije javnih nabavki. Potrebno je da bh. vlasti dodatno usklade Zakon o javnim nabavkama s pravnom stečevinom EU te ojačaju kapacitete Agencije za javne nabavke i Ureda za razmatranje žalbi. Također, potrebno je usklađivanja pravnog okvira o javno-privatnom partnerstvu i koncesijama sa standardima EU.

Komisija je ocijenila kako u oblasti poslovnog nastana i slobode pružanja usluga nije bilo napretka, te je istaknula važnost usvajanja zakona o uslugama i zakona o poštanskim uslugama koji su usklađeni s pravnom stečevinom EU. Zakonodavstvo u oblasti uzajamnog priznavanja stručnih kvalifikacija također je potrebno uskladiti s pravnom stečevinom EU.

Delegacija BiH je informisala da je u oblasti intelektualnog vlasništva usvojeno pet zakona te da je Prijedlog zakona o zaštiti oznaka zemljopisnog porijekla upućen u parlamentarnu proceduru. Među ključnim prioritetima ostaje usvajanje nove strategije intelektualnog vlasništva.

Evropska komisija je preporučila da se nastavi raditi na usklađivanju bankarskih propisa s propisima EU, kao i propisa koji se odnose na nebankarski sektor, uključujući osiguranje, investicijske fondove, tržišta vrijednosnih papira i infrastrukture finansijskog tržišta. Potrebno je, između ostalog, unaprijediti povezanost i usklađenost poslovnih registara između entiteta i Brčko distrikta. Kad je riječ o pravu trgovačkih društava i korporativnom upravljanju, Evropska komisija je pozvala na daljnje usklađivanje s pravnom stečevinom EU, a jedan od zahtjeva je da se odredi jedinstveno nadzorno tijelo koje će preuzeti krajnju odgovornost za nadzor nad ovlaštenim revizorima u cijeloj zemlji.

Delegacija BiH je informisala da su preduzete aktivnosti na pristupanju Protokolu o uklanjanju nezakonite trgovine duhanskim proizvodima, što je jedna od preporuka Evropske komisije.

Na sastanku se razgovaralo i o zaštiti potrošača, te o održivom finansiranju u oblasti javnog zdravlja i reformi zdravstvene zaštite koja će biti dostupna svim građanima.

O Pododboru

Devetim sastankom Pododbora za unutrašnje tržište i konkurenciju uključujući zaštitu zdravlja i potrošača u ime Bosne i Hercegovine je kopredsjedavala Brankica Pandurević iz Ministarstva za vanjsku trgovinu i ekonomske odnose, a u ime Evropske unije Heinke Veit iz Evropske komisije (DG NEAR). Pododbor za unutrašnje tržište i konkurenciju je jedan od sedam pododbora, zajedničkih tijela BiH i EU, osnovanih u skladu sa Sporazumom o stabilizaciji i pridruživanju u svrhu praćenja i nadzora nad njegovim provođenjem. O radu Pododbora vidi više na stranici Direkcije <https://www.dei.gov.ba/bs/stabilization-agreement>.

Direkcija za evropske integracije